

以堂堂之中國豈無練達老成者使提督會同館而使斯人見笑於外夷甚可嘆也○三更巽方有氣如火○癸卯下三公議于政院曰方好義之事予意以為欺罔之罪固所不免而逗遛之罪事干及好義受刑戮明何所據而罪之不可更推之意議于三公而三公之意亦如是其招兩司城上所示此議而言之○政院啓曰今之人心巧詐臣等亦為痛念不知何如而變薄歸厚平日念慮長在于此今聞傳教正合臣等之心今者骨肉之親以爭訟變為仇敵人心狡詐職此之由前有六十年三十年之限官吏若善用此兩法則訟事亦可省簡矣大抵變薄歸厚不但以法為之也且十年之內雖理直者以事故未呈而十年之外勿為聽理則怨悶不少矣如此則不得已又立法而救之矣此法似未可行也傳曰人心之狡詐虐為爭訟之所致故令議啓矣來啓之意知道○御夕講○臺諫啓前事不允○咸鏡道穩城自是月至二十一日或雨或雪山谷則雪深半尺○甲辰傳于政院曰見中原奇別序班胡士紳奏本有待外夷不遵古例欺蔽聰明等語果為至當以我國見之有南夷北狄待之過厚則弊生薄待則生怨一路往來除常儀外若國王及酋長使臣不可薄待況北狄生怨甚易尤不可薄待也大抵邊方